



Minggu, 25 April 2021

Ogen: Kuan-kuanen 24:13-14



Terang wari-warindu



Kalak Jahudi beluh kal ngajar. Tugas ngajar si pemena ras si utama eme orang tua. Si enda idatna arah Dibata nari. Mediate kal ia nandangi pengajaren man anak-anakna. Emaka melala cara si ilakokenna subuk arah makeken paksa-paksa bage pe arah alat peraga si ibahanna. I bas perdalinen kegeluhen anak-anakna enggo lit tahapen si idalanina. Umpamana umur lima tahun enggo ipetandakenna pengakun kinitekenna man anak-anakNa bagi si lit i bas Ulangen 6:4, "Dengarlah, hai orang Israel: TUHAN itu Allah kita, TUHAN itu esa!" Bage pe arah alat peraga si ilakokenna melala curakna. Salah sada eme arah tengguli bagi si lit i bas ogenta enda. Tengguli sada pangan si pentingkal man kalak Jahudi. Gambaren kerna Taneh Perjanjin Negeri Kanaan e jine pe ikataken "sampur dadih ras tengguli." Tengguli salah sada sumber nutrisi si penting man Jahudi. Janah enda ipake ncidahken pentingNa kepentaren (hikmat) i bas Dibata nari. Panlah tengguli e. Biasa kenca ogeken orang tua Kata Dibata (Taurat) maka suruhna man tengguli. Kata Dibata pe datna, nutrisi man kulana pe datna. Kata Dibata e pe entebu bagi tengguli adi rusur ioge, iukur-ukuri ras idalanken. Kata Dibata erkuasa mpelimbarui cara rukur, seh ngasup natap ku masa depan. Kepatuhen ngelakoken kata Dibata e mereken wari si terang eme masa depan si mehuli.

Icidahken i jenda lit keseimbangan antara keperlun kula ras pusuh perukuren. La terjeng kula tapi pe pusuh ras perukuren penting man Jahudi. Erdandanken si e maka banci terang wari-warina (masa depan) anak-anakna duana perlu iperdiateken. Tengguli guna kulana, Kata Dibata guna pertendinna. Bage me kita genduari pe ula lupa si dua enda gelah terang wari-wari anak-anakta.



Senin, 26 April 2021

Ogen: Keluaren 23:27-33

Sada-sada Ibere Dibata



Kitab Keluaren eme isina kotbah Musa i taneh Moap sope bangsa enda bengket ku Kanaan. Luar biasa si idah uga njelimetna Dibata arah Musa nikapken bangsa enda guna bengket ku negeri enda. Subuk secara pengajaren bage pe persikapan secara teknis.

Si erbahanca banci bengket kalak Israel enda eme erkiteken kuasa Dibata. Ia me si erperang guna bangsaNa. Janah kerina penduduk negeri enda ipelawes Tuhan eme erdandanken enggo ipilih Dibata negeri enda jadi inganNa encidahken sura-suraNa man doni enda. Emaka adi kalak erbahan jahat i bas negeri enda, la banci la ipelawes Dibata. Termasuk bangsaNa jine kune ia la ndalanken perjanjinna ras Dibata dingen encikep pedah Dibata maka ia pe ipelawes i bas negeri enda nari. Janah enda enggo pernah terjadi tupung Israel Utara ibuang ku Assyur ras Israel Selatan ibuang ku Babil.

Secara teknis maka ikataken Dibata sada-sada (bertahap) bangsa si ngiani negeri enda nadingken taneh Kanaan enda. Si enda gelah ula sempat rubia-rubia si meliar justru jadi masalah si mbaru man bangsa Israel erkiteken enggo lume kerina negeri enda. Janah lit si man perdiatenken bangsa enda eme gelah ula ipeturutna bangsa si deban nggeluh i je. Si e gunana eme gelah ula ibabina papak guna erban dosa entah nambah berhala-berhalana.


Teridah perbahanen Dibata eme sada-sada, la sekari kerina mis iberekenna keperluan bangsaNa. Tuhu, Dibata e meteh kerina keperluan, ras ngukuri kai si mehuli man banta. IaturkenNa perdalanan geluhta ku simehulina. Njelimet nge Dibata ngaturken ras mabai kegeluhenta bagi sura-suraNa. Erdandanken si e maka kita pe arus metenget guna ngidah ras ngeteh sura-suraNa gelah kai rencanaNa seh banta.





[The main body of the page is a large, blank white area with a wavy top edge, intended for writing.]







Blank writing area with a wavy top edge.